



საქართველოს გაერთიანებული სახელმწიფოს და სოფლის მეურნეობის მინისტრი

ბრძანება N 2-34

15/01/2019

ქ. თბილისი

ქ. ქუთაისში შპს „გრინ პიკის“ პოლიეთილენის ნარჩენების (ნარჩენების აღდგენა) გადასამუშავებელი საწარმოს მოწყობასა და ექსპლუატაციაზე სკრინინგის გადაწყვეტილების შესახებ

შპს „გრინ პიკის“ მიერ გზშ-ს ჩატარების საჭიროების დადგენის მიზნით საქართველოს გარემოს დაცვისა და სოფლის მეურნეობის სამინისტროში წარმოდგენილია პოლიეთილენის ნარჩენების გადასამუშავებელი საწარმოს მოწყობის და ექსპლუატაციის (ნარჩენების აღდგენა) პროექტის სკრინინგის განცხადება.

საქმიანობის განხორციელება დაგეგმილია ქ. ქუთაისში, ავტომშენებლის ქუჩა N88, შენობა N15 (ნაკვეთის საკადასტრო კოდი 03.01.21.358). საპროექტო ტერიტორია და მასზე განთავსებული შენობა-ნაგებობები წარმოადგენს შპს „GEORGIAN HUASHUN INTERNATIONAL INDUSTRIAL INVESTMENT GROUP LTD“ საკუთრებას, რომლის ნაწილსაც იჯარით, ხელშეკრულების საფუძველზე ფლობს შპს „გრინ პიკი“.

წარმოდგენილი განცხადებით, ტერიტორია დასახლებული პუნქტიდან დაშორებულია დაახლოებით 300 მეტრით. ტერიტორია, სადაც დაგეგმილია საქმიანობა წარმოადგენს კაპიტალურ შენობა-ნაგებობას (N15). ტერიტორია დაფარულია ასფალტის საფარით, ადგილზე მცენარეული საფარი და ნიადაგი წარმოდგენილი არ არის, თუ არ ჩავთვლით გამწვანების მიზნით დარგულ ხე-მცენარეებს (ე.წ გაზონის სახით).

აღსანიშნავია, რომ მიმდინარე წლის 18 ივნისს სამინისტროს ანალოგიური სკრინინგის განცხადებით მომართა შპს „გრინ პიკმა“, რაზეც სამინისტროს მიერ გაიცა სკრინინგის გადაწყვეტილება (ბრძანება N 2-609), რომლის საფუძველზეც საქმიანობა გარემოზე ზემოქმედების შეფასებას დაექვემდებარა. ძველი სკრინინგის განცხადებით, საპროექტო შენობაში (საკადასტრო კოდი 03.01.21.358, შენობა N3) შპს „გრინ პიკის“ გარდა, მსგავსი საქმიანობის განხორციელებას იმავე შენობაში გეგმავდა შპს „ქლინ რი პროსესი“, რაც თავის მხრივ იქონიებდა კუმულაციურ ეფექტს გარემოზე. არსებულ სიტუაციასთან დაკავშირებით, შპს „გრინ პიკმა“ მიიღო გადაწყვეტილება, რომ ორი კომპანია ტერიტორიულად დაეშორებინათ ერთმანეთისგან, რაც თავის მხრივ გამორიცხავდა კუმულაციურ ზემოქმედებას, კერძოდ შპს „ქლინ რი პროსესის“ საწარმო განთავსდება იმავე საპროექტო შენობაში (შენობა N3), ხოლო შპს „გრინ პიკის“ საწარმო ქუთაისის თავისუფალი ინდუსტრიული ზონის სხვა მხარეს (შენობა N15), რაც შპს „ქლინ რი პროსესის“ საპროექტო ტერიტორიიდან დაშორებულია 400 მ-ით. ამგვარად, მოხდა კუმულაციური ზემოქმედების თავიდან არიდება. ამის შემდგომ, საჭირო გახდა ახალი

სკრინინგის დოკუმენტის სამინისტროსთვის წარდგენა. შესაბამისად, კომპანიამ ახალი სკრინინგის დოკუმენტით, ცვლილების აღწერით მომართა სამინისტროს.

საწარმოში დაგეგმილია ადგილობრივი და იმპორტირებული (ნედლეულის სასაქონლო კოდი: 3915100000) დაბალი სიმჭიდროვის პოლიეთილენის შექმნა შემდგომი გადამუშავების მიზნით. საწარმოში იგეგმება 35 ადგილობრივი მოსახლის დასაქმება, ინვესტიციის მოცულობა დაგეგმილია 1 300 000 აშშ დოლარის ექვივალენტის შესაბამისად. საწარმო გეგმავს დღე-ღამეში 6900 კილოგრამი პროდუქციის დამზადებას, რაც წელიწადში 207 ტონას შეადგენს.

ტექნოლოგიური ციკლის მოკლე აღწერა: ავტოტრანსპორტით ნედლეულის ტერიტორიაზე შემოტანა; კონტეინერიდან ხაზოვანი პოლიეთილენის გადმოტვირთვა; დახარისხება; დაქუცმაცება; გაწმენდა; გაშრობა; ცხელი დნობა; მავთულისებრი ხაზების შექმნა და დაგრძელება; გრანულებად დაჭრა; შეფუთვა.

პირველ ეტაპზე ხორციელდება კონტეინერიდან ხაზოვანი პოლიეთილენის გადმოტვირთვა, ნედლეულის დახარისხება ხდება ხელით, ფერების მიხედვით. შემდგომ ეტაპზე ხორციელდება დახარისხებული ნედლეულის სპეციალურ დანადგარში მოთავსება, რა დროსაც ხდება მისი დაქუცმაცება 5სმ2 ზომის ნაწილებამდე. ამის შემდგომ ხორციელდება დაქუცმაცებული ნედლეულის გარეცხვა სუფთა წყლით. დაქუცმაცებული და გარეცხილი ნედლეული განთავსდება სპეციალურ გამშრობ დანადგარში. შემდგომ ეტაპზე გამოძშრალი, გარეცხილი და დაქუცმაცებული ნედლეული გადაადგილდება სპეციალური ცხელი დნობის დახურულ კონტეინერულ დანადგარში, სადაც ხდება ნედლეულის 300 გრადუს ცელსიუსზე გაცხელება ორ ეტაპად, რათა დაქუცმაცებული ნედლეული გადავიდეს მდნარი მასის მდგომარეობაში მისი შემდგომი დამუშავებისთვის. გაგრძელებული მავთულისებრი მასა ხვდება სპეციალურ აპარატში, სადაც ხდება მისი დაჭრა 1 სმ-ზე ნაკლები ზომის გრანულებად. აღნიშნული გრანულები წარმოადგენს საწარმოს საბოლოო პროდუქტს.

საწარმოო პროცესში წყალი გამოყენებული იქნება ნედლეულის გასარეცხად და გასაგრძელებლად, წელიწადში იგეგმება 2484 ტონა წყლის გამოყენება.

წარმოდგენილი განცხადების მიხედვით კომპანიის ოპერირებით წლის განმავლობაში მოსალოდნელია 0,9ტ არასახიფათო ნარჩენის წარმოქმნა, კომპანია გეგმავს ნარჩენების მუნიციპალურ ნაგავსაყრელზე განთავსებას. ასევე მოსალოდნელია სახიფათო ნარჩენების, წელიწადში 120 კგ წარმოქმნა (ჩვრების, ეკო.ნათურების), რაზეც კომპანია გეგმავს ხელშეკრულების გაფორმებას შესაბამისი უფლებამოსილების მქონე კომპანიასთან. ასევე კომპანიის განმარტებით, ნედლეულის მტვრისგან ჩამორეცხვის შემდეგ მიღებული წყალი ჩაეშვება საკანალიზაციო სისტემაში.

ქუთაისის ინდუსტრიულ ზონაში ოპერირებს სხვადასხვა საწარმო, თუმცა იმის გათვალისწინებით, რომ საწარმოს მოწყობა გათვალისწინებულია კაპიტალურ შენობაში და სხვა საწარმო აღნიშნული შენობის ტერიტორიაზე არ ფიქსირდება, კუმულაციური ზემოქმედება მოსალოდნელი არ არის.

საწარმოს ფუნქციონირების პროცესში მოსალოდნელია ხმაურის გავრცელება და ატმოსფერულ ჰაერში მავნე ნივთიერებების გაფრქვევა, თუმცა საწარმოს სპეციფიკიდან გამომდინარე, საწარმო განთავსდება კაპიტალურ შენობაში, მნიშვნელოვანი უარყოფითი ზემოქმედება ატმოსფერულ ჰაერზე მოსალოდნელი არ არის.

აღნიშნული საქმიანობა არ უკავშირდება რაიმე სახის მასშტაბური ავარიის ან კატასტროფის რისკს. საქმიანობა არ არის დაგეგმილი ჭარბტენიან ტერიტორიასთან, შავი ზღვის სანაპირო ზოლთან, ტყით მჭიდროდ დაფარულ ტერიტორიასთან, სახელმწიფო ტყის ფონდსა და დაცულ ტერიტორიებზე. ვიზუალური შეფასებით საპროექტო ტერიტორიაზე არ ფიქსირდება კულტურული მემკვიდრეობის ძეგლი.

წარმოდგენილი დოკუმენტაციით დგინდება, რომ დაგეგმილია ნარჩენების გადამამუშავებელი საწარმოს (ნარჩენების აღდგენა) მოწყობა და ექსპლუატაცია ქუთაისის ინდუსტრიულ ზონაში, რომელიც გარემოზე მნიშვნელოვან ზემოქმედებას არ გამოიწვევს.

ზემოაღნიშნული კრიტერიუმების გათვალისწინებით, „გარემოსდაცვითი შეფასების კოდექსი“-ს მე-7 მუხლის მე-6 ნაწილის საფუძველზე

ვ ბ რ ძ ა ნ ე ბ:

1. გაიცეს სკრინინგის გადაწყვეტილება, რომ შპს „გრინ პიკის“ პოლიეთილენის ნარჩენების გადამამუშავებელი საწარმოს მოწყობა და ექსპლუატაცია (ნარჩენების აღდგენა) არ დაექვემდებაროს გარემოზე ზემოქმედების შეფასებას;
2. შპს „გრინ პიკი“ ვალდებულია საქართველოს კანონის „გარემოსდაცვითი შეფასების კოდექსის“ მე-7 მუხლის მე-8 ნაწილის შესაბამისად უზრუნველყოს გარემოსდაცვითი ტექნიკური რეგლამენტით დადგენილი მოთხოვნებისა და გარემოსდაცვითი ნორმების დაცვა;
3. ბრძანება დაუყოვნებლივ გაეგზავნოს შპს „გრინ პიკს“;
4. ბრძანება ძალაში შევიდეს შპს „გრინ პიკის“ მიერ ამ ბრძანების გაცნობისთანავე;
5. სკრინინგის გადაწყვეტილების გამოცემიდან 5 დღის ვადაში სკრინინგის გადაწყვეტილება განთავსდეს სამინისტროს ოფიციალურ ვებგვერდზე და ქ. ქუთაისის მუნიციპალიტეტის აღმასრულებელი ორგანოსა და წარმომადგენლობითი ორგანოს საინფორმაციო დაფაზე;
6. ბრძანება შეიძლება გასაჩივრდეს თბილისის საქალაქო სასამართლოს ადმინისტრაციულ საქმეთა კოლეგიაში (თბილისი, დ. აღმაშენებლის ხეივანი, მე-12 კმ. N6) მხარის მიერ მისი ოფიციალური წესით გაცნობის დღიდან ერთი თვის ვადაში.

ლევან დავითაშვილი



მინისტრი